

知州鄧以和捐俸重修

國朝康熙二十八年知州汪源澤重建

敬一亭在州學萬曆十三年知州周邦爵遷
城外二十四年知州王世守復遷建城中

名宦祠在戟門左祀唐張說李邕宋推官徐
的知州陶弼陳永齡楊友紹岳霖元達魯花
赤凍阿朮明知州蔡惟溥李純

國朝遊擊陳誥

鄉賢祠在戟門右祀唐諫議大夫甯悌原平

章姜公輔明國子監丞梁里許刑部主事蘇均知縣陳善住知府楊冠通判章獻中

靈山縣儒學舊在石六峯東南去縣治二里宋治平二年遷縣治東寶祐四年攝尹趙崇商復遷石六峯故址元末燬于寇明洪武四年重修三十四年知縣李善初遷于縣治左景泰元年知縣羅宣改遷城中千戶所之東成化六年僉事林錦重修嘉靖十四年僉事王崇復遷故石六峯嘉靖三十七年知縣經

彥案復遷於城內萬曆十三年知縣呂調和
遷於南城外工未完知縣彭繼美續成之其
制中爲

先師廟爲東西廡爲戟門門左爲名宦祠右爲
鄉賢祠前爲櫺星門右爲敬聖祠祠前爲敬
一亭廟左爲明倫堂爲東西齋後爲教諭屏
爲訓導屏前爲儒學門外爲泮池二十四年
知縣李榆修葺始樹卧碑立石題名三十二
年知縣陳文選詳允改建城內關王廟之東

沿至明末迄

國朝初年兵荒圯燬康熙四年知縣多弘安擇於西門外闢地鼎新中爲

聖殿東西列兩廡前爲儀門左列名宦祠右爲鄉賢祠外爲櫺星門六年邑人勞炫建啟聖宮於殿後訓導王啟輔董成知縣林長存重加增飾日久圯壞康熙四十二年知縣段曦從衆議遷建于城內縣治西工未竟段令行取四十五年知縣李晉繼之僅成正殿五十

五年知縣葉昌捐金四十議建啟聖祠越明年知縣李培仁踵而成之並創兩廡名宦鄉賢二祠大成櫺星諸門及月臺泮池照墻周以繚垣煥然一新六十年知縣唐開運闢廟右地建明倫堂

社學

府社學在府治東知府胡鰲卽還珠驛舊址建店舖七間爲延師之費後仍改回還珠驛今廢養正社學在舊府學西同知章諍建今廢

西溪社學在府城西舊接官亭右同知章諍

建今廢

東津社學在府城東朝天門外知府何御建

今廢

北園社學在北街小書院邊知府何御建

西江社學在府城西永濟橋北知府何御建

永安社學去府治二百里在千戶所城內僉

事林錦建

梁村社學在永安城西南十里知府張岳建

今俱廢

欽州

中和社學在東門外

城南社學在南屯村

發蒙社學在蒙村

茶山社學在茶山洪屋村

水東社學在州水東村

騰龍社學在古城騰龍村

雷峯社學在北定烏雷北

亨雷社學在那雷村

蘆山社學在蘆荻村

平江社學在蛟子村

如洪社學在洪江左

留峯社學在板留村

造村社學在那遠村

凌霄社學在板霄村

思淳社學在思蘆村

白峯社學在管界巡司白雲屋下

同文社學在時紅都防城池

思文社學在貼浪都思干村

以上俱知州林希元建并記今

俱廢

靈山縣

養正社學在海北書院之南成化七年僉事

林錦遷城內宋泰街歲久而圯嘉靖十七

年僉事孫世祐以故址卑改建

有造社學在林公祠後正德五年僉事李瑾

建歲久而圯嘉靖十七年僉事孫世祐以

故址卑改建今俱廢

書院

了齋書院在府治西宣化坊下宋陳忠肅公
謫居讀書之所有司卽此爲了齋祠嘉靖十
八年知府張岳遷祠于合浦縣學改故址爲
府前總舖

海天書屋舊在元妙觀後嘉靖初知府韓鸞
建延謫合浦簿陳迥以教廉士今書屋廢其
地改爲府學田後爲知府詹瑩取入陳迥記